

Učaci Kur'ana su Allahovi dostojanstvenici

Zahvala pripada Uzvišenom Allahu, dž.š., donosimo salavat i najljepši selam našem Poslaniku i miljeniku Muhammedu, a.s., njegovoj porodici, ashabima i svima onima koji ga vjerujući i čineći dobra djela slijede.

Hvala Allahu Uzvišenom, koji je Svojim robovima milost ukazao poslavši im Vjerovjesnika, a preko njega Knjigu jasnu u kojoj je objavio:

"Laž joj je strana, bilo s koje strane, ona je Objava od Mudrog i hvale dostojnog." (Fussilet 42)

On je svojom Knjigom osvijetlio stazu pravog puta, detaljno objasnio pravila ponašanja i razliku između dozvoljenog i zabranjenog. Kur'an je sam po sebi, svjetlo i sjaj, spas od zavođenja i lijek za duše. On je neraskidiva veza sa Bogom i sigurno utočište. On obuhvata sve i učenjaci neprestano otkrivaju nove spoznaje i koristi od Kur'ana. Kur'an je uputa i milost svima koji ga uče i slijede. Svako ko u njega vjeruje sretan je, ko njime govori iskren je, ko ga se pridržava upućen je, ko postupa po njemu uspio je, ko se sa njim druži kod Allaha je u društvu odabranih.

Uzvišeni Allah je zagarantirao da će Kur'an ostati očuvan u originalu kada je objavio:

"Mi uistinu Kur'an objavljujemo i zaista ćemo ga Mi čuvati." (Hidžr 9.)

Jedan od načina čuvanja jeste i njegovo kontinuirano učenje i proučavanje.

Nas Poslanik, mir Božiji neka je s njim, u raznim prilikama poticao je svoje ashabe na svakodnevno učenje Kur'ana, kako bi Božija objava osnažila njihove duše i osvijetlala im stazu pravog puta. Sretan je svaki onaj koji uči i druži se sa Objavom koja nam je dostavljena. Zato braćo, ima li veće privilegije od te da čovjek svojim grijешnim ustima može izgovarati Riječi našeg Gospodara.

Allah, dž.š., na dosta mjesta hvali svoju Knjigu, ističe njenu savršenost i obećava velike nagrade onima koji ju uče, i usklađuju svoje ponašanje po njenim principima:

"Oni koji Allahovu Knjigu čitaju i namaz obavljaju i od onoga čime ih mi opskrbljujemo udjeljuju, i tajno i javno, mogu da se nadaju nagradi koja neće nestati, da ih On prema onome što su radili nagradi i još im iz obilja svoga da, jer On mnogo prašta i blagodaran je." (Fatir 29.i 30.)

Allah, dž.š., objavio je Kur'an, da bi ljudi njegovim svjetlom, išli putem istine. Stoga će onaj koji Kur'an uči, čvrsto prihvatiti, slijedi i razmišlja o porukama njegovim, postići ono što želi i na ovome i na budućem svijetu.

Učiti Kur'an, braćo, je obaveza.

Tu obaveznost razumijevamo iz mnogih ajeta.

Tako Allah Uzvišeni veli:

"Uči iz Knjige Gospodara svoga ono što ti se objavljuje, niko ne može da izmjeni riječi Njegove, pa ni ti. Osim kod Njega nećeš naći utočišta nikakva." (Al-Kahf 27)

Draga braćo, Bog svojata sebi učače Kur'ana. Tako Poslanik a.s veli:

"Allah zaista, među ljudima ima svoje dostojanstvenike. Neko upita, ko su oni Allahov Poslaniče? Učaci Kur'ana su Njegovi dostojanstvenici i odabranici."

Stoga, ko želi da se svrsta u tu odlikovanu skupinu Allahovih šticećenika, neka se intenzivno druži sa Kur'anom.

Čak nam je i obaveza pokazati posebno poštovanje prema učačima Kur'ana. Tako Muhammed, a.s, u jednom hadisu veli: *"Ko se nada susretu sa Allahom, neka iskaže počast Allahovim dostojanstvenicima. Neko upita: Allahov Poslaniče, zar Gospodar ima dostojanstvenike. Odgovorio je: da! Allahovi dostojanstvenici na dunjaluku su oni koji uče Kur'an. Ko im iskaže postovanje Allah će izkazati poštovanje njemu i darovat čemu Džennet, a ko ih omalovaži i Allah će njega i uvesti ga u Džehennem. Kod Allaha nema poštovanijeg od istinskog hafiza Kur'ana. Poštovaniji je od svih drugih osim vjerovjesnika."*

Braćo draga, ne propuštajmo ovakve prilike, sigurno da svako od vas, ako se potruđi, naučit će čitati Kur'an, i trudit će se da to što bolje radi, jer što ga ljepše, tečnije i ispravnije učiš, tvoj stepen kod Boga je veći.

Tako Reulullah, a.s, u jednom hadisu veli:

"Onaj koji vješto uči Kur'an bit će u društvu plemenitih pisara, a onaj ko zamuckuje i ima poteškoća pri učenju, imat će dvije nagrade za to."

U drugom hadisu se veli:

"Ko hoće da se uvjeri da li voli Allaha i Njegovog Poslanika, neka se provjeri sa Kur'anom, ako vidi da voli Kur'an, on uistinu voli Allaha i Njegova Poslanika."

Učite Kur'an jer Allah neće kazniti srce u kojem se on nalazi.

Ako ga učimo u našim kućama, među našim porodicama, udaljavamo šejtana, a meleki se u nju nasele. A ako nema Kur'ana tu se šejtani nasele.

"Osvjetlite svoje kuće namazom i Kur'anom", savjetuje nas Poslanik, a.s.

Draga braćo, korist za onoga koji uči Kur'an nije samo ovodunjalučka, Allah Milostivi dozvolit će Kur'anu da se zauzima za čovjeka koji ga bude učio, druge podučavao i u praksi bude primjenjivao.

"Trojica će na Sudnjem danu biti na pješčanom brežuljku od crnog mošusa, neće se uplašiti polaganja računa, niti će osjetiti ikakav strah sve dok se ne završi s drugima:

-čovjek koji je učio Kur'an tražeći Allahovo zadovoljstvo i predvodio ljude tako da su oni bili zadovoljni sa njim,

- osoba koja je ezan učila u džamiji i pozivala Allahu, žudeći za Allahovim zadovoljstvom i

- osoba koja je iskušana bogatstvom na ovome svijetu, pa ga to nije zabavilo da radi za onaj svijet."

Allah žee roditelje onih koj uče Kur'an, na Sudnjem danu označiti krunom čija će svjetlost biti bolja od svjetlosti sunca.

Ako će roditelji na glavama imati zlatne i blještave krune, kakve li su tek blagodati i počasti pripremljene za samog učača Kur'ana Časnoga.

Sretan je onaj ko je Kur'anu dao mjesto u životu, ko u njemu prepoznaje neiscrpnu snagu i zaštitu, i ko život prilagođava njegovim porukama.

Kad su meleki prvi put čuli učenje Kur'ana, a to je bilo prije na hiljadu godina nego je Svemogući Bog stvorio stvorenja, njihovom divljenju nije bilo kraja , pa su rekli: *"Blago li se umetu kojem će se to objaviti, blago li se prsima koja će to nositi i blago li se jezicima koji će to izgovarati."*

Kako tužno djeluje saznanje da toliki broj muslimana ne zna i ne želi učiti Allahovu Knjigu, a imaju priliku da nauče. Dragi brate, sa ovog časnog mjesta u ovom mubarek danu petka, opominjem, savjetujem sebe i vas: nemojmo izbjegavati to Allahovo svjetlo koje osvjetljava naše duše, kuće i prostor u kojem boravimo. Ne izbjegavajmo svjetlo koje nas mraka čuva, iz tmine na svjetlo izvodi. Ne izbjegavajmo svjetlo s kojim razaznajemo pravi put od stranputice, istinu od neistine. Ne izbjegavajmo Svjetlo, koje će nam na Sudnjem danu zagovornik biti, i u kuću vječnosti sa sretnicima uvesti.

Allah nam pomogao na putu dobra, amin!

Hutba, 07.09.2018., Hasan ef Jašarević